

東
華
續
錄

東華續錄

乾隆七十六

臣王先謙敬編

臣周潤蕃恭校

秋七月戊午朔諭軍機大臣等美諾明郭宗等處地方緊要海蘭察等帶兵駐紮清釐一切地方剿殺賊眾辦理接續臺站事務皆合機宜前經降旨令海蘭察暫駐美諾辦事俟阿桂回美諾後海蘭察再帶兵攻剿今閱伊等奏捐南路一帶之賊額森特等已經痛殲前進而留兵看守之橋仍被賊占雖因留兵數少不能抵禦以致被奪但額森特等去時業將賊眾俱行剿殺並燒毀寨落則此項賊番又從何來或於剿殺時躲避俟伊等過後復出侵擾乎抑或他處賊番來奪此橋乎今普爾普自沃克什帶到貴州兵三百名卽派其前往奪橋殺賊普爾普人誠實漢仗亦好海蘭察等

酌量領兵接應所辦甚是至沃克什土司與兩金川素有仇隙雖
自當固守地方但力弱不能禦賊今防守沃克什之事僅劉秉恬
一人前往恐不能濟事著海蘭察於滿洲領隊大臣侍衛等擇其
曾經歷練之人派令前往方爲有益○己未定順天府尹府丞
等官缺出開列凡籍隸直隸人員俱迴避例○庚申豐昇額奏據
知府盛英稟稱綽斯甲布土司工噶諾爾布告稱聞索諾木潛使
人誘約三雜谷土司令於智固山一路截斷宜喜糧臺隨行知五
福官達色李天佑實力嚴防並獎勵各土司令其照前出力並嚴
守智固山地方仍札諭優獎工噶諾爾布示以信任之意令其派
人探聽隨時報聞又沃克什土司色達克拉所屬人眾俱隨溫福
大營所餘惟有婦女老幼已飛咨富勒渾安爲查辦諭軍機大臣
等豐昇額此次調度均屬合宜不意其竟能如此爲之稍慰逆酋

潛謀斷路實屬可恨計其爲時已久尙無動靜自可以保無虞然究當留心防範至沃克什一路關係緊要已早諭富勒渾等酌派將領帶兵往駐今豐昇額所辦與朕意適合且計其移咨日期在朕降旨之前富勒渾接到卽辦自更妥速目今急務惟盼阿桂速至美諾整兵剿賊恐阿桂以退兵爲嫌不肯輕撤然朕自六月二十三日至今已屢次詳悉傳諭阿桂自應遵旨回兵美諾迅卽剿復布朗郭宗盡殲羣賊廓清小金川見在之事無有要於此者旬餘以來盼望阿桂信息至廢寢食阿桂當善體朕意將此一併傳諭知之○諭美諾明郭宗已俱失守海蘭察見退至日隆駐兵防守賊眾竟敢如此猖獗殊堪痛恨總由營中未派滿洲兵無可倚恃致屢爲怯懦不堪之緣營所誤實切憤懣此時急務惟接濟阿桂爲要美諾之路旣斷阿桂難從原路退出自應速由達烏一帶

同至章谷已有旨令富勒渾博清額普爾普成德四人帶兵往迎阿桂並飛諭圖思德將續調之黔兵一千星速起程遄進徑赴打箭爐一帶接應阿桂奉到此旨卽速整兵由章谷一路退出毋稍遲疑至僧格宗爲當噶爾拉至章谷要路阿桂前奏已派兵嚴守昨額森特伍岱復自美諾勦洗河南一帶賊寨與阿桂通路想已至僧格宗守住或當酌從深嘉布等處經由巴旺布拉克底一路而出阿桂自能妥酌辦理此時總以阿桂整軍而出爲要他事皆可緩商也至豐昇額等一路前已屢降諭旨令其撤兵赴大板昭勦殺賊眾並斷賊番後路今美諾等處旣不能守賊勢方熾豐昇額等不宜復往大板昭一路勦賊計伊等接奉前旨自己起程若仍由正地一帶原路退回恐太迂遠自應由黨壩三雜谷一路回至巴朗拉等處暫駐但須於撤兵時辦理妥密毋致緣營輕動並

諭各土司等此時雖暫撤兵俟新派之滿洲勁旅到齊卽分路另
籌進剿仍須至該處進兵該土司等毋得稍有疏懈如此方爲妥
協阿桂等卽將何日退兵迅速加緊覆奏以慰注念○癸亥諭軍
機大臣等阿桂奏當噶爾拉軍營防剿賊匪情形所辦俱合機宜
朕心稍慰賊匪敢於如此猖獗阿桂見在鼓勵眾心尙能堅守兩
三月其志甚屬可嘉但美諾已不能守海蘭察俱撤兵退至日隆
阿桂卽在當噶爾拉駐守亦難急圖攻剿而小金川之地又難卽
時克復且賊勢方熾我力稍單阿桂自應速由章谷一路整兵而
出爲要是以前日一聞海蘭察退回日隆之信卽傳諭阿桂迅速
由章谷退兵且俟新派京兵及續調陝甘雲南湖廣各省綠營兵
到齊另籌分路進剿並諭富勒渾博清額普爾普成德帶兵往迎
阿桂今復授富德爲參贊大臣諭令先行馳驛兼程赴川如遇新

派之西安駐防兵二千及自請赴營之成都駐防兵五百並貴州續調之一千兵湖南已經起程之二千兵有可帶往者卽速帶領前赴章谷迎接阿桂並令色布騰巴勒珠爾亦按程趕赴成都俟有陸續兵到卽行帶領由打箭爐前往接應但看阿桂之意不肯輕退者必因營中兵力不足在外又無應援若急於撤兵恐綠營軍心易動而賊人轉得伺我之隙在後追躡所籌亦是今富勒渾等及富德接續到彼官軍聲勢漸盛阿桂自當趁伊等到後卽將當噶爾拉軍營料理周妥與富德等內外夾攻以次整兵而出回至內地方慰懸注至豐昇額等一路朕心亦深慮念前諭其移兵往剿大板昭之賊昨聞美諾退兵一事復諭令卽帶兵由黨壩三雜谷一路回至巴朗拉若此旨到時豐昇額等尙在宜喜則自彼由革布什咱巴旺布拉克底之境至當噶爾拉軍營較爲徑捷豐

昇額等就該處見在情形斟酌萬全行之再成德一員前已有旨
補授川北鎮總兵所有鎮遠鎮總兵員缺著阿桂另揀軍營出力
之員奏請補授至所請調兵之摺於阿桂未經奏到之時已分別
派出其山西兵路既遙遠且亦不甚得力自可無庸調往今通計
所謂兵共一萬七千軍勢亦可大振統俟到川後阿桂等悉心妥
議另籌分路進剿迅奏膚功○吏部議准江西巡撫海成奏稱贛
州府屬定南縣地處萬山界連江廣政繁事劇向設知縣不足以
資彈壓請裁定南縣知縣一缺將贛州府同知移改爲定南廳從
之○甲子命舒赫德爲武英殿大學士兼刑部尚書調阿桂爲戶
部尚書以永貴爲禮部尚書○丁卯諭前聞溫福在木果木軍營
倉卒遇變臨陣捐軀特加恩賞給一等伯爵世襲罔替嗣據劉秉
恬奏初九日未申時忽有客民二三千並匠役人等奔赴登春詢

稱木果木礮局已被賊番搶劫大營四門關閉客民無可依倚因各散回初十日賊番悉眾湧至斷截大營水道綠營兵紛紛潰散遂致失事等語是溫福軍營民散在前兵潰在後實係溫福未能先事豫防所致營中礮火係三軍之命若聞賊擾布朗郭宗之信早派精兵嚴守後路防護礮局何至爲賊搶劫而客民匠役數千亦當收之營內爲彼護持卽備人數以助軍威亦無不可斷無堅閉營門聽其散去之理旣示賊人以弱且致搖惑眾心則溫福之倉皇失算其死乃由自取今復據海蘭察富勒渾等查奏溫福軍營陣亡文武大小各員多至數十人而將弁兵丁之未出者至三千餘人此皆溫福乖方債事以致折將損兵使其身尚在卽當立正典刑以申軍紀豈可復膺五等之封所有賞給伯爵著銷去但念其究係陣亡仍著交部照例議卹其應得何世職卽令伊子永

保承襲至劉秉恬身任總督令往美諾彈壓又令其移駐簇拉角克往來巡防並因董天弼懦弱無能屢論劉秉恬隨時體察儻不實心出力卽據實嚴參治罪乃劉秉恬於美卧溝要隘並不及早奏請調兵駐守設法嚴防而於董天弼退居美諾經溫福嚴飭始回底木達劉秉恬又並不查參及董天弼另立一小營不在官寨同眾兵駐守賊匪因得伺隙竄入劉秉恬亦於事後始行奏及是美卧溝之失守致賊匪侵占肆擾皆由董天弼所誤實屬死有餘辜而平時措置失宜又復漫無覺察釀成事端劉秉恬之咎亦實無可追前降旨將伊革去總督仍賞按察使銜在軍營隨同辦事尙不足以抵其罪劉秉恬著革職留於軍營自備資斧效力贖罪如不知感激激愧奮復有貽誤一經將軍總督等奏聞卽行正法示眾至德爾森保係專駐木果木後山防守之人乃不能實力防禦

致賊匪衝突溫福大營兵潰失事况德爾森保前隨明瑞軍營已獲重譴復經棄瑕錄用仍不知改悔奮勉誤事若此其罪與董天弼等不能因其已死曲爲原宥著將伊子拏交刑部治罪並將家產查抄以爲負恩失律者戒所有提督馬全牛天畀皆係出力有用之人副都統巴朗阿爾素納屢經覓往立功今皆力戰死事實堪軫惜馬全牛天畀著交部照豆斌之例議卹巴朗阿爾素納著照扎拉豐阿之例議卹仍查明伊子交御前大臣帶領引見候朕另降諭旨總兵張大經雖未著有勞績而效命亦殊可憫著照高天喜之例酌減議卹其餘陣亡武職兵丁及被害文員著將海蘭察富勒渾查到原單交該部查明均照陣亡例一體議卹此等殁於王事之人在國家雖有優卹旌褒渥典以慰忠魂而自將領至兵丁三千餘人同時陷歿不惟心惻亦且顏赧國家百餘年用兵

舉人則准其與下科新進士一體殿試候朕酌量降旨錄用○癸酉阿桂明亮奏色木則之旁有古嚕一處令參將富金保帶兵分駐賊番屢次侵擾俱被官兵擊退其往攻色木則之兵因賊番所據碉座地勢較高雖節次攻撲究係仰攻不能得力惟晝夜嚴防使賊不能截斷僧格宗往來之路再策爾丹色木墨壘溝卡了翁古爾壘等處皆與金川接壤雖此一帶叛番均經殲戮其最關緊要之隘口亦撥兵防守而其間道路叢雜前後左右皆可偷越此時最要事機莫急於撤出官兵先防後路官兵均可安全無恙而嚴守各隘尙可待續到之兵爲合力進攻之舉其後路中有前已經駐兵者加兵助守其前未駐兵者酌量安設且如章谷吉地等處亦卽爲綽斯甲布後路於此一帶周防嚴密臣等與豐昇額信息相通彼此籌辦於事機頗爲有益因於二十五日陸續撤兵分

撥於思紐得里翁古爾壘阿仰及卡了邦科約咱索布章谷等處嚴防臣等帶滇兵一千六百於本月初一日親自斷後徐徐撤兵見在翁古爾壘思紐扼要地方暫爲存駐悉心籌辦以爲再進之計諭軍機大臣等連日盼望阿桂軍營信息甚爲懸切因屢諭富勒渾及富德等速往帶兵接應今阿桂自當噶爾拉軍營將兵陸續撤出在翁古爾壘等處暫駐朕心稍慰阿桂等業已全師而出而翁古爾壘至章谷一帶均經嚴加防守自可無虞逆酋以內地土司敢於如此鳴張尤屬神人共憤實爲天理所不容惡貫滿盈滅亡必速今已添派京兵二千吉林兵二千黑龍江兵一千頃據海蘭察奏又添派索倫兵一千合之西安荊州駐防兵各一千伊犁厄魯特兵一千是八旗勁旅有九千並選能帶兵之侍衛章京亦數十員又續派之雲貴陝甘湖廣等綠營兵催令赴川者共萬

餘名計其陸續到軍營通計二萬數百名阿桂卽當酌定章程另籌進剿一面妥辦一面奏聞至豐昇額等一路昨令馳赴阿桂軍營策應今阿桂旣已回駐翁古爾壘等處無庸豐昇額接濟軍營機宜移步換形不可稍涉拘泥亦非朕所能懸斷著傳諭豐昇額如未起程卽當駐宜喜軍營以備再進或已行至中途亦不妨帶兵仍回宜喜並可隨處諭知各土司以將軍見已整師而出滿洲勁旅及各路精兵十萬亦俱陸續調派卽日復籌進剿以此鎮撫眾番方爲妥協豐昇額等卽酌量該處情形一切與阿桂札商而行劉秉恬仍令在巴朗拉一帶辦事文綬卽馳赴成都辦理兵行事宜並籌辦潰兵以及地方要務其桃關一帶卽令富勒渾前駐往來照料無庸再赴阿桂軍營又奏臣等因賊匪蔓延四出前敵旣不能驟撤後路更屬可虞正在籌辦聞據前敵屯土各弁稟稱

金川賊番屢來懇求稟話臣等欲藉以窺測賊情當飭將備等嚴加詰問賊稟稱我金川係大皇帝家舊土司如今官兵百姓等我金川一點不敢侵擾等語查賊番自侵擾木果木等處以來所得槍礮鉛藥糧石銀兩器械等物爲數甚多業經志得意滿而以當噶爾拉官兵甚爲勁銳賊匪連次敗衄深知我兵未可動搖轉恐添兵攻剿故爲此狡詐之謀且妄冀大兵從此歇手可以倖逃天討坐獲小金川之地實堪切齒但此時兵力未齊不能合力剿洗而當噶爾拉後路險仄懸長如翁古爾蘆策爾丹色木等處懸崖鳥道止須數十人據截雖有多兵不能衝過卽如木果木一路官兵二萬有餘德爾森保一經失事卽不足恃皆因後路一斷兵卒等慌張潰亂所致今賊番不於此等要隘坐困官兵而轉來稟話是在賊番已爲失計而在我兵撤居險要見在則易防後路將

來仍易於進攻於事轉有把握莫若將計就計權爲撤出新兵一
至即可統率再進爲雪憤埽巢之策惟是今昔情形迥殊且此事
關係甚大皇上自必特簡大臣來川容臣阿桂等公同籌辦以
定勦滅兩金川之局諭軍機大臣等阿桂此次辦理事事妥協甚
屬可嘉已授爲定邊將軍統辦進剿之事實堪倚任此外大臣等
亦罕有能出其右者阿桂卽當實力擔承此事不必稍存疑惑惟
進剿之路不可不通盤籌畫豫爲安定看來昔嶺當噶爾拉及宜
喜等三路皆係仰攻未必有益將來再進時此等止可爲牽綴賊
勢之用必須另籌安地以期克捷制勝因閱地圖內金川之噶拉
依勒烏圍兩處險隘皆在河南賊番悉力拒守攻之非易若於河
北覓可進兵之路一在革布什咱之境由西而東一在綽斯甲布
或黨壩之境由東而西攻其不備自可易於得手若能得其河北

之地則河南賊勢自必動搖併力夾擊便可埽穴擒渠剋期奏績
阿桂應卽悉心籌度密詢熟悉道路之人就該處山川形勢詳細
酌量是否可行卽速繪圖貼說據實覆奏候朕定奪○甲戌諭昨
據阿桂奏當噶爾拉後路翁古爾壘至章谷吉地等處並關緊要
均應嚴密防範因於六月二十五至七月初一等日將各營盤官
兵次第徐徐撤退親自斷後振旅而出見駐翁古爾壘等語辦理
深合機宜朕心實爲欣慰已將奏到各摺宣示中外矣阿桂自聞
木果木軍營之信能鎮靜嚴防鼓勵將士當賊人屢次侵擾俱經
官兵剿殺今全師撤駐翁古爾壘不獨南路一帶可以無虞並可
與豐昇額等宜喜軍營聲息相通以待新調之八旗勁旅及各省
精兵陸續到營收復美諾等處另籌進剿金川甚屬可嘉所有隨
阿桂自當噶爾拉撤出之兵未嘗非綠旗士卒乃能與賊相持十

餘日悉力拒擊，凝然不動。整隊撤回，較之溫福營中綠旗兵同爲受國恩、養之人，一則知方，一則非人類。著阿桂傳旨，將在事之綠營屯土兵練各賞一月鹽菜銀兩，以示獎勵。其中或有身雖在營而委靡不出力者，亦當查明扣出，毋令濫邀恩賞。至溫福軍營有兵不下二萬，何至一聞賊至，紛紛潰散？實出意料之外。將帥之於三軍，倚爲捍衛。若猝遇有變，至棄將軍於不顧，相率潰竄，以致主帥失眾，捐軀按律應悉駢誅罪，在不赦。今特汰其甚者，從寬免死，量予遣戍，實出法外之仁。然朕究不免失之姑息，而此輩實爲倖免。遣發省分之各該督撫，俱應共深憤嫉。於此輩不少姑息，有犯法者，卽當立正典刑，庶以彰國法而申軍紀。至見在隨征之綠營兵眾，並當聞而知恥，引以爲戒，痛加改勉，以冀立功膺賞。設仍狃於怯懦之惡習，怙終不悛，將來或有臨敵輕退易動之事，必當

盡行誅戮卽人數略多亦斷不可惑於罰不及眾之說曲爲寬宥也朕於軍律賞罰嚴明惟秉大公以期平允卽將此通諭軍營及中外知之○丁丑諭軍機大臣等見在仍須先攻小金川令阿桂在南路富德在西路統兵進剿收復其地所有一切機宜昨已傳諭阿桂酌量妥辦並密諭阿桂除見剿金川三路外另於河北一帶訪覓安路攻其無備今思阿桂在南路必仍由僧格宗一路進攻若僧格宗尙能守住自爲便易卽或張玉琦亦已帶兵退出究係輕車熟路攻取亦較上年省力但旣至僧格宗必仍俟攻復美諾後再行收剿底木達等處恐逆酋僧格桑聞信豫行竄逸豈不失此機會著諭阿桂於富德到營後與之講論明晰令其由成都馳赴日隆帶兵同海蘭察進剿於攻得資哩後卽帶兵往截美臥溝斷絕賊酋歸路或由沃克什明郭宗前進或由別斯滿一路前

進臨時酌量而行俟富德等截住美卧溝之路阿桂速偵訪逆酋下落若在美諾卽統兵先剿美諾若仍在底木達布朗郭宗卽先剿底木達等處與富德成夾擊之勢方爲萬妥今西安駐防兵二千已於七月十四日至二十一日全數起程到營必速已諭文綬俟其到省時南路西路各分一半令卽馳赴其各省所謂之兵貴州一千最早餘如湖南雲南陝甘湖北亦俱可陸續到川各按兩路分撥前往阿桂於此各處生力兵到後約敷兩路之用卽通知富德等同時進兵總須於今冬將小金川全行克復仍分路進剿金川愈速愈妙看來兩金川氣候冬令尙多晴霽是以前此攻克巴朗拉美諾等處皆於冬底成功此皆已事之可見者阿桂務須竭力熟籌妥辦並卽豫籌將進剿金川之路分兵進攻出其不意以期克捷○阿桂明亮奏兩金川賊人自侵軼底木達布朗郭宗

以來牽連肆擾致木果木美諾一帶臺站地方皆不能固守以各路大兵進討彼卽竭力負隅猖獗何至於此實由董天弼本係衰庸疏於防範且不守碉卡另立營盤賊番窺伺已久而各處臺站兵本無多又皆怯懦是以底木達等寨一經失守各處軍臺望風奔潰至該督等查拏夾壩並不於賊番出沒之處督兵擒剿轉照內地緝捕之例分派兵於降番各寨逐一搜查以致番眾驚疑生怨賊匪得易於勾引一處煽動各處皆因而滋擾木果木一路每次進攻未曾得利徒致損傷而所拏卡棚零星分布其中有僅十餘人及二三十人者賊番窺破併力於一二處則其餘各處相繼潰散至木果木失事時登春牛廠賊眾尙屬無多惟因散出客民兵夫從此經行兵卽不戰而逃而美諾沃克什相繼失守覈其潰敗之由實因兵自逃散並非賊番之力能至於此且據功噶爾拉

木果木脫出兵供稱賊番分頭搶撲於木果木登春一帶所獲鉛藥槍礮軍器米糧等項爲數雖甚多而其打仗賊番止有此數實無可加添卽小金川降番勦殺之餘俱依附金川亦不過千餘人臣等一面俟派調滿漢官兵來川一面將續辦進攻情形通盤籌畫並將西路各兵設法鼓勵以作其氣申明軍律以悚其心務痛勦賊番先清美諾進堵金川誓必不令兇狡兩逆酋倖逃法網又奏六月二十九日准豐昇額來咨詢當噶爾拉一路是否需兵應援臣等以見在南路防範嚴密無庸接應惟西路官兵除新調黔兵一千數百並臣等南路派往千餘外其餘出來之兵均不足恃新調黔兵應令卽赴巴朗拉達木巴宗等處以資防守並已飛咨劉秉恬富勒渾等辦理至臣等帶兵殿後撤出時見沿途各隘皆有土兵駐守接應始知巴旺布拉克底土司已將得力頭人盡數

派出並攢集土兵把守後路其明正土司及革布什咱土都司亦各尙知報效不肯爲賊番等所眩惑此次後路防範嚴密賊番不敢前來窺伺甚爲得力又奏查從前底木達布朗郭宗等寨爲賊所占其時未久自不能卽爲堅拒上緊攻剿或可期其速得今美諾扼要之地已經失守而小金川沃克什地方官兵經年所攻克者均爲所占南北阻絕不通此際情形與從前迥不相同已無分攻底木達布朗郭宗之路而南路兵力僅數堵守亦不能更攻開此路至奉旨令豐昇額舒常由大板昭剿賊之處查收復底木達及布朗郭宗地方自應於別斯滿及大板昭等處分路進攻但此時西路非俟新兵到日不能舉動而各省所調新兵非三四月不能全到見旣未能遽攻底木達布朗郭宗則豐昇額等此時亦尙可無庸移駐致啓綽斯甲布土司之疑計綽斯甲布距大板昭路

途不遠俟將屆進兵之期或仍酌留舒常在日旁宜喜等處牽綴賊勢再令豐昇額統兵前赴大板昭一帶合力攻勦似爲妥善臣已札知豐昇額酌妥辦至滿洲勁旅自較綠營爲足恃今蒙派調健銳火器兩營及吉林索倫厄魯特兵五千陸續前來於攻勦旣爲得力而此時失事之餘軍心亦藉以自壯臣遵旨將見派滿洲勁旅數萬添勦之處曉諭各營兵並傳知各土兵等使共知賊酋勢在必滅庶足以作其勇往之氣其新調官兵應赴何處備用亦俟鑒定全局後檄知帶兵將領遵照分進又奏昨准海蘭察劉秉恬等將美諾明郭宗沃克什等處失守情形咨會前來綠營兵本多怯懦而西路又失於撫恤以致人無戰心但自木果木而美諾自美諾明郭宗而沃克什望風退避處處皆成瓦解此時海蘭察退守日隆劉秉恬先至巴朗拉查自巴朗拉以至美諾此路實

爲進勦小金川正路但道路延長其閒如斯底葉安資哩沃克什路頂宗明郭宗形勢均爲險絕自前歲進勦以來官兵節節力攻如資哩攻至三月有餘沃克什攻至五月有餘路頂宗明郭宗二處亦皆攻至兩三月有餘而資哩尙以截後而得沃克什尙以設計而取歷時一載始能逐次開通其大板昭一路董天弼亦攻至三月之久並無寸進直至美諾旣破然後底木達布朗郭宗望風而下今此數處旣復被賊番占據則其備禦愈嚴死守愈力而大兵進勦事宜亦當早爲豫備美諾木坪兩處道路不通文報皆由省城來往動至旬餘於實在消息旣難迅速相通且於緊要事宜更難乘機酌辦當噶爾拉後路險隘之所均爲我兵所據如翁古爾壘以前之思紐迪西之真登梅列等處悉已防守嚴密或與僧格宗碉寨相望或據其上游俟新兵調至攻取尙不爲難至明亮

於此一路甚爲熟習自應遵旨令其帶兵駐守以緩賊勢臣將各處防守事宜督催辦竣輕騎簡從擬於數日內自南路起程馳赴巴朗拉達木巴宗一帶察看情形與諸大臣等亟整兵力熟籌進取之策並與督臣等將撥夫運糧接濟等事悉心經理約計爾時色布騰巴勒珠爾亦抵軍營更可將一切機宜公同商酌再行詳悉奏請訓示諭軍機大臣等阿桂奏覆查辦軍營事宜及陳明賊番滋擾緣由皆與朕節次所降諭旨脗合美臥溝失事之故皆爲董天弼所誤實屬死有餘辜而劉秉恬不早參奏其罪亦無可道見在添兵易將氣象一新從此舉動順利自可仰邀天佑迅速成功阿桂等當實力勉爲之至見籌收復小金川自須仍由西南兩路進攻而西路多係木果木潰出委靡之兵不可不急爲整頓阿桂親往經理於事更爲有益茲已另諭色布騰巴勒珠爾富德俱

馳赴日隆一路與阿桂會商諸事西南兩路何者尤爲緊要阿桂卽同色布騰巴勒珠爾進攻其一路則令富德同明亮進剿至大板昭一路或令舒常帶兵或另派人前往均著阿桂詳晰妥籌悉心調度又前據阿桂奏一聞賊番侵擾底木達等處之信料其必有小金川番人爲內應卽察各寨頭人內之迹涉可疑者羈留營中不令回寨所辦甚爲得要此等頭人看守軍營作何處治未據奏及亦著阿桂附摺奏聞又阿桂另摺奏請將後調黔兵一千令赴巴朗拉達木巴宗等處以資防守已飛咨劉秉恬富勒渾辦理等語所辦甚是西路潰出之兵驟額不振不可不酌添新兵另爲措置以冀改觀見在添調滿漢各兵幾及二萬已分兩路前往備用阿桂可悉心斟酌令於各兵到省後卽按兩路分撥照料前往至豐昇額等軍營見兵不及六千力太單弱且又無滿洲得力之

兵著阿桂於新到各兵內酌量撥給並須籌及進剿金川時或應
仍在宜喜一帶另覓進攻之路亦豫爲撥往備用以省臨時更調
之勞其阿桂見駐之翁古爾壘一帶後路均已派兵嚴防可無他
慮惟豐昇額等在宜喜軍營其後路未經辦及恐賊窺見阿桂見
已撤兵海蘭察等又退至日隆料小金川地方尙無攻剿之事或
注意豐昇額一路潛出滋擾不可不豫爲防範昨已諭令各營卡
盡力嚴守設有賊至必須奮力殲除使之破膽但其後路毗連賊
境之處頗多均須設法防守著阿桂一併籌畫派員帶兵分防以
期萬妥至所奏巴旺布拉克底土司派出土兵把守後路其明正
土司及革布什咱土都司亦經添派土兵前來甚屬可嘉見已明
降諭旨酌賞綵段以示獎勵令其益加奮勉至頭人穆塔爾於帛
噶爾角克碉既破數日後率其眷屬來降似無他意富勒渾未免

過於疑或實係誠心投順不肯從賊亦未可知又不應不分皂
白轉將跟役拘囚妻孥繫累致使失所阿桂至彼親加察訊均不
難得其底裏如穆塔爾形迹果有可疑卽派員解京候訊若降順
屬實仍將其跟役家屬給還另爲安插亦著阿桂妥辦具奏○庚
辰命桂林馳赴四川軍營辦理糧運○甲申命伍岱赴四川軍營
○吏部議准陝甘總督勒爾謹奏烏魯木齊新設迪化州地處邊
隅幅員遼闊知州一員勢難統轄請將迪化州知州改爲直隸州
知州甯邊州同改爲知縣作爲州屬從之○丙戌諭軍機大臣等
阿桂奏飭諭各土司以天朝新添滿漢精兵數萬務在必滅金川
俾安番眾之心並可仍資其力甚屬合宜至所稱新兵漸集應分
三路進取此時先須收復小金川自當如此籌辦看此三路中沃
克什旣爲正路尤關緊要且日隆等處見有之兵多係潰退之餘

心多怯懦尤不可不亟爲振作鼓舞以期奮勵阿桂自應在此一路領兵令色布騰巴勒珠爾爲參贊大臣其別斯滿一路令副將軍豐昇額統兵以海蘭察爲參贊帶兵進攻至南路統兵尙需副將軍一人如阿桂因明亮在營辦事年餘於各土司已能駕馭可勝此任卽令明亮爲副將軍富德爲參贊大臣若阿桂以富德久經練習於統兵之事相宜卽令富德爲副將軍明亮爲參贊大臣帶兵由河南一路攻打美諾惟在阿桂熟思妥酌總期於事有益據實奏聞請旨其攻打美諾似當從後山由上壓下前已於圖內貼說諭商阿桂當臨時酌量妥辦至進攻沃克什之兵一經攻得亦應量度彼時情形或卽進取明郭宗與美諾一路會合或明郭宗已經克復卽並攻底木達布朗郭宗亦爲甚便總在阿桂相機妥酌而行又所稱綽斯甲布一處酌留大員攻打並爲牽綴金川

之勢見今宜喜軍營仍令駐兵不動以鎮撫綽斯甲布兼就所有糧臺礮局在彼防護以待分路進剿金川之計自爲一舉兩得今豐昇額既令往別斯滿一路統兵其宜喜軍營自當令舒常在彼駐守昨已諭令伍岱馳赴豐昇額軍營豐昇額往別斯滿進攻時或帶伍岱或帶馬彪同往聽其酌量帶用其大板昭一路前恐僧格桑尙在小金川自當派兵斷其歸路今阿桂又聞其已回金川若果其言可信大板昭係通金川之路止須於要隘派兵防禦卽無虞賊人軼出滋事設或僧格桑仍在小金川則大板昭仍須派員帶兵堵截勿使鼠逸亦在阿桂確訪行之

八月戊子諭阿桂著授爲定西將軍將內閣所貯定西將軍印交兵部迅速由驛發往給阿桂行用其定邊將軍印卽行繳回○命于敏中爲文華殿大學士兼戶部尙書○己丑諭軍機大臣等豐

昇額等奏見仍駐兵宜喜與朕意適合且不拘泥前旨甚屬可嘉
惟後路關繫緊要已屢諭添兵前往並飭阿桂妥爲籌辦照料今
豐昇額奏與阿桂處聲勢相通得以隨時酌商則由宜喜至章谷
一帶後路可以無慮其黨壩至三雜谷一帶在在與金川賊境毗
連俱係宜喜後路不可不實力防範業經諭令五福仍駐黨壩加
意嚴防其官達色所帶之兵並令豐昇額調回宜喜備用豐昇額
自當隨時妥爲措置至宜喜一路即使能得賊碉亦止於山頂駐
守不宜深入此時距分勦金川之期尙需數月旣不便頓兵不動
致囑士卒銳氣又不宜不審利害隨時攻撲賊碉爲當差塞責之
舉必如何方爲妥善亦著阿桂悉心籌畫通知豐昇額酌辦至目
下收復小金川自以西路爲要蓋西路中又兼沃克什別斯滿兩
路自非阿桂不可昨已將應派將軍副將軍參贊何人在何路進

勦之處詢商阿桂今阿桂卽日將抵日隆而各省所調之兵尙未到齊阿桂酌看情形或可先帶兵移駐資哩仍於臨進時將各路應用兵眾派調停妥一面通知豐昇額馳赴別斯滿訂期會勦以便迅速集事或豐昇額不便調來卽當另派大員領兵前進惟在阿桂妥酌而行頃檢閱將軍印譜內定西將軍印係順治年間將軍愛星阿征勦逆賊李定國等追擒朱由榔時所佩帶成功甚速最爲吉祥因卽授阿桂爲定西將軍並將愛星阿曾用之清字原印交兵部由驛遞送阿桂卽祇受行用迅奏膚功又諭見在收復小金川之舉西路尤爲緊要而西路又分沃克什別斯滿兩路其中通賊徑隘極多自非阿桂帶兵不可而別斯滿一路或令豐昇額前往或另派妥員昨已諭令阿桂酌辦其南路情形見據阿桂奏眞登柵列甲爾木以及緊要隘口均屬我兵據守一俟應進之

時卽可前進恢復看來南路進攻尙易前已諭商阿桂或以明亮爲副將軍富德爲參贊或以富德爲副將軍明亮爲參贊令其父酌覆奏定奪是南路統兵之人亦有定局且明亮於彼處路徑已熟阿桂尤當在西路及早調度約計新兵到營足敷派用卽可會期進剿專盼捷音又據奏上緊整頓西路舊兵並通籌全局議定道路剋期迅進似將來應進之路阿桂胸中已有成竹朕意今年所攻之當噶爾拉功噶爾拉兩路賊人守拒甚堅若再從此兩路進兵仍屬無益卽宜喜軍營亦未能得力此三路止可爲牽綴賊勢之用究須另覓別路進兵就圖中形勢而論三雜谷及黨壩比較易進不知實在如何或此外更有勝於此路者諒阿桂自必籌之已熟軍營一應機宜朕惟阿桂是倚阿桂亦更無可諉惟當密爲妥籌迅速具奏以副朕望○以程景伊協辦大學士調王際華

爲戶部尙書蔡新爲禮部尙書嵇璜爲兵部尙書以閻循琦爲工

部尙書

由工部左侍郎遷

○庚寅免渥巴錫交納借給馬匹○辛卯諭前

因溫福在軍營漫無調度倉卒遇變輕以身殉致陣亡文武大小官至數十員而將弁兵丁之未出者至三千餘人同時陷沒實爲從來用兵所未見揆其失事之由皆因溫福之倉皇失算以致折將損兵其死乃由自取豈可復邀五等之封已將賞給伯爵銷去並明降旨宣示中外矣昨巴雅爾至熱河詢及木果木軍營致潰情形據稱溫福性褊而愎參贊以下之言槩置不聽又不察地勢之險易不知士卒之甘苦常令攻碉多傷兵歟其實並未能得賊人緊要碉卡安營之後復距水甚遠平時旣不得人心臨事又全無措置以致於潰然巴雅爾係厄魯特人其言尙未足盡信今富興至行在復面加詳詢據所稱溫福之急躁乖方不聽人言於參

贊將領等不能虛衷商榷大率與巴雅爾所言相合而其不愛恤兵力常令伐木運石築柵拏卡不得休息且派撥萬餘兵分守千餘卡以極盛兵力散處零星均歸無用實爲失策此皆其從未奏及者至於隔數日派兵攻碉明知碉堅路險難以施功猶不肯撤退致兵丁輕冒槍石無故損傷而其每次攻碉打仗如官兵傷亡過多卽不按數奏聞輒以查明咨部之語含糊具奏又分派各路將領時溫福營中除德爾森保外不留御前及乾清門侍衛一人恐於朕前洩其情狀是溫福竟敢意存欺罔實出情理之外前因溫福在烏魯木齊辦事認真親率兵剿捕倡亂逆賊且曾隨兆惠等在軍營閱歷因命其由滇入蜀代阿爾泰統兵伊甫至軍營卽攻克巴朗拉收復達園等處軍勢大有起色因卽擢任大學士並授爲將軍伊亦頗知感奮初不料其躁妄乖張不恤士卒失策價

轅一至於此使其身尚在卽當立正典刑以申軍紀今已歿於王
事朕斷不肯追治其罪惟諭阿桂豐昇額等當引以爲戒不可蹈
其覆轍並自悔前此之誤任溫福又誤信其言不發滿洲勁旅悔
已無及惟有引咎自責仍不欲於事後諉過臣下所有應得世職
仍著該部照例給予並將此再行通諭知之○癸巳瓦爾達緣事
革職以德風爲盛京戶部侍郎由內閣學士遷○戊戌諭明亮著授爲定
邊右副將軍卽著富德爲參贊大臣在南路一同帶兵進勦○庚
子吏部議准浙江巡撫三寶奏杭州府屬海甯縣係海疆要地賦
重差繁兼有塘工修築應升爲州其事簡之湖州府屬安吉州應
降爲縣從之○壬寅 上自避暑山莊巡幸木蘭行圍○ 御製
避暑山莊紀 恩堂記文曰圓明園之紀 恩堂紀受 恩之自
避暑山莊之紀 恩堂紀受 恩之蹟名同而實異文異而事同

一而二二而一者也蓋 皇祖養育予於宮中之旨原降於圓明

園之紀 恩堂茲不復贅然其時實仍居 皇考藩邸中及從

皇祖來避暑山莊乃 賜居斯堂之側堂卽三十六景中所謂萬

壑松風者夙興夜寐日觀 天顏綈几繙書或 示章句玉筵傳

膳每 賜芳餼批閱章奏屏息侍旁引見官吏承 顏立側或

命步射以示眾臣持滿連中 皇祖必爲之色動至於釣魚而得

則令持去以給 皇考若隔旬餘半月則 遣往獅子園以謁

聖母而其年秋隨 皇祖幸木蘭又有宜紀者入木蘭初圍場曰

永安莽喀圍中有一熊 皇祖御火槍中之熊伏不動久之 皇

祖謂其已斃 命御前侍衛引予去射之意欲使予於初圍得獲

熊之名也其時予甫欲上馬而熊突起奔前 皇祖御虎槍殪之

事畢入武帳 皇祖顧 溫惠皇貴太妃指予曰伊命貴重乃以

射熊事告之曰使伊至熊所而熊起馬驚成何事體又一日虞者告有虎 皇祖命二十一叔父後封懷郡王者往予跪奏願去

皇祖曰汝不可去俟朕往之日攜汝去耳似此 深恩彼時不知

至於今每一念及卽欲墮淚夫五十餘年之事歷歷如昨而予六旬有三亦視曾孫矣不有以紀之子若孫其何由知之此予所以追憶而涉筆也子若孫其尙念我 皇祖何以眷顧我之深及我之乾乾矻矻何以不敢負 皇祖之恩將億萬斯年永丕基而承

天眷胥在是矣詎惟一堂之記云乎哉○癸卯吏部奏河南歸德府通判岱清阿升貴州平遠州知州以親老請改補近地得旨親老改補近省本屬漢員相沿之例在漢員各居本籍若一告親老卽扣除其缺並不令改補近省轉無以遂其祿養之私故定例先期豫爲呈明將來坐補原缺旣防規避亦體人情行之原屬無

礙若八旗人員與漢員本不相同卽不爲外任在部在旗均得當
差報效豈可因憚於遠涉仍聽其在外希榮戀棧乎況我滿洲舊
習惟知體國奉公遇有差遣從不敢畏難避遠今若效尤漢人事
例則尊君親上之誼久必漸忘於風俗人心甚有關繫吏部照漢
員一體定例之處殊未允協嗣後八旗升遷官員如實係親老不
能遠離者得缺後許其呈報該部聲明緣由帶領引見候朕臨時
酌量或以旗員或以部缺改用自無不可俟該員養親事畢仍照
伊原得之缺坐補其豫爲地步巧行規避之例永著停止庶不致
蹈襲虛名有乖舊俗著爲令所奏之岱青阿卽照此例行○乙巳
轉謝墉爲工部左侍郎以李友棠爲工部右侍郎由內閣學士遷○王子
諭內大臣工部侍郎三和宣力有年恪勤匪懈昨冬因患病請假
隨命御醫診視時復遣使存問今夏特賞給人蔭俾得從容調攝

以冀就痊忽聞溘逝深爲軫惜著賞銀五百兩料理喪事其任內革職降級之案准其開復凡有一切應賠應繳各項著加恩槩行寬免所有內大臣應得卹典仍著該部察例具奏尋予祭葬諡恪勤○吏部議准署河東河道總督姚立德奏兗州府泇河通判管理河湖閘壩事務殷繁請改爲兗州府泇河同知其事簡之沂州府沂河同知應改爲沂州府沂河通判從之○以劉浩爲工部侍郎由副都統遷○癸丑刑部議奏發往烏魯木齊效力贖罪人員如僅止革職及原擬杖徒者到戍後如果奮勉出力爲期已滿三年應仍令各該處辦事大臣奏聞請旨定奪若所犯本係軍流不足蔽辜加等改遣新疆者雖三年期滿行走無過一槩不准回籍無庸奏請得旨改發新疆人犯內情罪較重者從前槩定三年期滿之例原未允協今刑部請照軍流永戍於法固屬得平第念新疆究

與內地不同若永遠不准放還又覺過重但三年爲期太速且不當與情輕人犯漫無區別嗣後由重罪改遣新疆人犯到戍後如果奮勉自效已及十年者著加恩准該將軍及各辦事大臣等援引此旨奏聞一次其應否准令回籍之處候朕臨時酌奪著爲令

○四川總督富勒渾奏臣前派兵在松林口山梁施放槍礮原爲牽分賊勢將來大兵到齊分路進攻掃除賊人各寨使逆酋前後不能照應得旨此事尤可笑溫福在營時每晚令人放槍徒費火藥竟成何事不謂綠營惡習中人之深如此可恨可鄙亦無怪汝之以此爲妙計也

九月戊午諭軍機大臣等奎林至詢及阿桂在當噶爾拉撤兵事所言甚詳阿桂於此事措置得宜從容中度可謂善於經理至賊酋索諾木屢次差人具稟並差賊目丹巴沃咱爾來營欲求官兵

議出阿桂因將計就計全師而出所辦必當如此彼時賊意欲官兵撤至章谷阿桂若漫無見識輕率遠退舉上年費力攻得之地盡行棄去卽不能無罪今退至思紐翁古爾壘既有要隘可據後路可守整兵再進收復小金川尙有可憑之勢是阿桂此次退出所繫甚重朕前此爲之日夜懸望及聞其旣出不但以爲非且深爲嘉慰至見在收復小金川自較易辦而將來進剿金川不免稍難今年所用之當噶爾拉功噶爾拉及宜喜三路俱屬仰攻費力止可存爲牽綴賊勢之用或於黨壩三雜谷正地等處另覓便捷之路諒未必俱屬險要難以施功卽或亦有險仄之徑其後路皆我土司地方不至如功噶爾拉當噶爾拉等之應防及意外也○己未禮部侍郎金甡因病乞休允之○壬戌阿桂奏海蘭察等駐守美諾不能設法禦賊此其應得之咎不能解免但自木果木

失事之後人心散亂已極斷非伊等一二人所能整飭其罪雖無可逭其情或有可原應將海蘭察革去參贊降爲領隊大臣仍革職留任其副都統公富興副都統烏什哈達總兵成德富紳署總兵海祿均革職留任俟有奮勉出力之處再予開復從之○乙丑上駐蹕避暑山莊○戊辰上恭送皇太后自避暑山莊回鑾○諭原任江西布政使顏希深見因服闋來行在陛見朕深知其平日尙屬明白能事著卽馳驛前赴四川覺木交一路幫同鄂寶辦理糧務○己巳諭軍機大臣等豐昇額等奏脫出番婦鄂魯木楚稟稱索諾木令伊兄岡達克往住美諾僧格桑見在金川之科思果木等語是僧格桑之不在小金川自非虛飾金川逆酋施此奸狡實爲可惡可恨蓋索諾木弟兄之意久思吞併各土司地界雄踞一方又料小金川番眾力難號召因借僧格桑之力前往

誘脅番人使見舊土舍復來自必一呼可集索諾木遂乘此利便糾眾往擾然未嘗不畏官兵之復進若留僧格桑在美諾勢不能不助兵拒守且慮僧格桑久占故巢與舊番相習自必聯爲一氣後難動搖因仍擱歸金川以絕小金川諸番依戀舊酋之念又令其兄岡達克前往美諾監制設或官兵進剿卽驅小金川人守拒自不能不聽其指揮苟幸無事便可攘爲己有其設計險惡實堪切齒第其不留僧格桑在美諾賊酋等自謂得算而不知其已失小金川人心此於官兵收復實爲最好機會至所奏進兵之路已密派妥人偵探並將情形札商阿桂俟其指示遵辦等語豐昇額等既見有可進之處不似宜喜日旁之仰攻費力自當從彼進兵今見派之滇兵一千西安駐防一千俱已先後到營而阿桂所撥之陝甘兵一千計亦可陸續而至豐昇額等得此新兵卽可添爲

進剿之用但必須察看形勢審度機宜實有利便方可奮勇直前以期必勝斷不可復似今年春夏進兵時以打仗撲礮爲塞責之舉果能攻得一二險要亦可稍省將來分剿之力第阿桂此時正籌收復小金川其金川之局尙未辦及今諸路未發獨此一路先進卽得力亦不宜深入止可擇其緊要山梁駐兵控扼俟各路併剿金川時豐昇額等卽從彼乘勝進攻使賊番照顧不暇於事更爲有益○壬申 上自避暑山莊回鑾○轉李宗文爲禮部左侍郎以莊存與爲禮部右侍郎由內閣學士遷○甲戌裁多倫諾爾監督○乙亥諭大學士舒赫德至京奏及伊犁滿洲官兵所住城內並無水道掘井極深亦不能得泉惟恃挑挖溝渠數十里以引伊犁河及烏哈爾里克河之水或遠赴河內擔取一過秋汎河水亦不能引卽多給遣犯工食令其擔賣而人煙眾多不能周到水一擔需

銀數分於兵丁大爲不便等語伊犁城中駐兵數千取水不便於生計大有關繫必須急籌長策何不另擇善地築城遷移卽修城建屋非一時所能竣工且多糜帑而無水供飲所關匪細自不可惜費誤公但辦理遷移先須多備木料而該處夫匠恐亦不敷應用莫如先得一所木料卽先造成一所房屋撥兵居住將所空之房拆毀擇其可用之木料補修後又造一所如此陸續蓋房遷移不過數年卽可完竣至夫匠一項見有綠營兵及眾回人俟其農隙予價作工旣於伊等有益而工務亦可成就惟在該處將軍悉心辦理著傳諭伊勒圖務卽留心勘擇於有水及弁兵可居之地如何修城建屋陸續移駐經久可行之處妥協詳議具奏○丙子命刑部侍郎袁守侗軍機處行走○阿桂奏接奉諭旨令詳議何路進兵查南路本係臣領兵攻擊之處情形熟悉其西路喀爾薩

爾一帶臣前次亦曾經過並詢之前曾到過此路之大臣侍衛章京並眾土司頭人等知喀爾薩爾在功噶爾拉之前必須由牛廠進攻其地險峻異常難以搶占且春冬雪大不能行走夏時雪化又須從山趾下至山溝再登兩旁之山若將此作爲正路進兵稍難至木果木以西山勢險峻自下仰攻甚爲費力此外如巴旺一路亦可進兵而添兵安站殊費周章再美臥溝在木果木之北其地雖通勒烏圍而深林密箐谷口狹隘官兵不能越險且後路縣長恐難接續其綽斯甲布一路何處可以進兵臣已詢之豐昇額等俟覆到日再行定議具奏報聞○戊寅 上奉 皇太后還京師○庚辰諭吏部尙書託庸敍歷中外宣力有年雖齒逾八旬而精力尙未衰邁簡任部務久資經理今據奏夏秋病後漸形委頓步履甚艱懇請解任調養情詞甚爲懇切託庸著照所請以原官

致仕仍晉太子太保以示優寵其吏部尙書員缺著官保調補刑部尙書員缺著英廉補授仍兼辦戶部侍郎事務

冬十月丙戌朔諭本日據薩哈岱鍾音奏拏獲遣發爲奴脫逃之俄羅斯費約多爾等三犯因八月爲停刑之月飭交該縣嚴行監禁於九月初四日正法一摺固屬照例辦理但此等脫逃要犯自應決不待時豈可拘於常格况停止行刑月日原指尋常人犯而言若遇緊要重犯應勒應決者均宜隨時審辦設或拘泥舊文繫獄太久難保無防守懈弛乘閒越獄自戕等事致令倖逃法網殊有關繫朕於讞獄用刑權衡至爲慎重若遇罪無可貸者卽偶值令節慶辰亦諭法司按律訊治從不稍存忌諱而外省督撫等因向有違例行刑處分懼干吏議不亦昧於輕重之宜乎嗣後除尋常案件仍照定例月日停刑外其有兇盜逆犯干涉軍機應行立

決及當加刑勒者均卽隨時辦理聲明咨部不得拘泥舊例著爲令並將此通諭知之○丁亥豐昇額舒常奏綽斯甲布土司工噶諾爾布病故查土司舊例均係平日指定嫡出之子具報襲職今嫡子雍中旺爾結眾心歸向可否准其承襲諭軍機大臣等番地舊例旣應嫡子襲職土司在日卽行指定則所有綽斯甲布土司之職自應順其習俗令雍中旺爾結承襲俾番眾相安莫若於襲職時豐昇額傳喚雍中旺爾結到營諭以爾旣係工噶諾爾布嫡子且經爾父指定於例應襲雖爾係金川之甥又係其壻本將軍等已據實奏聞今奉大皇帝諭旨以爾父工噶諾爾布素稱恭順派兵攻勦爾必能勉繼父志力圖報效已諭爾承襲土司之職大皇帝撫馭番夷惟事開誠布公爾當益知感奮至恩賞爾父孔雀翎爾父生前未及戴用今本將軍仍差員齎賞以爲爾父身後光榮

並亦奉旨將賞給爾父之翎卽著爾戴俾體爾父未竟之心竭誠
宣力以承恩眷至爾父前因有病未得在營出力令爾兄綽爾甲
木燦代其隨征今爾既襲土職且又年富力強理應親自隨營奮
勉圖報將來平定金川時本將軍卽據實奏聞大皇帝自必重加
恩賞其綽斯甲布官寨諸事爾派頭人管理亦可不致貽誤至於
綽爾甲木燦則諭以爾年來隨營征勦金川實爲出力經本將軍
具奏蒙大皇帝加賞職銜花翎今土司之職番俗例襲嫡子而雍
中旺爾結又係爾父生前指定是以照例令其承襲爾惟努力盡
心倍加勇往若將金川靖蕩卽當敘爾功績陳奏大皇帝自有重
恩其善勉之如此明白宣諭使其兄弟之心各安著詢問阿桂審
定情形如此辦理是否妥協如與朕意見相同卽一面覆奏一面
密札豐昇額照辦豐昇額接奉此旨俟阿桂覆到後遵照辦理○

以索琳錢載彭元瑞俱爲內閣學士

索琳侯補內閣學士錢載由詹事彭元瑞由少詹事遷

○戊子諭軍機大臣等此次征勦金川籌辦銀糧各項止圖寬裕儲備遂至存積太多實非長策卽如溫福軍營遺失之米至一萬七千餘石銀五萬餘兩火藥至七萬餘斤固由溫福庸劣乖張漫無調度遂至藉寇兵而齎盜糧但攻勦之兵務在乘勢深入非駐紮軍營不須動移者可比自應籌爲可進可退迅速進行雖軍食宜使充裕亦當計及得勝再進時裹帶利便不可轉以糧多成累至火藥固攻戰要需止須略爲寬備足供十日半月之用仍籌陸續接濟則攻具旣常有盈餘而進兵亦易於攜帶方爲妥協至於軍營銀兩計每月所需官兵鹽菜之項爲數無多自應按月解送營中支給眾兵令其各自存用卽所備臨時賞需之項亦止可酌存數千以備緩急設有特旨加賞之事原可由該督處按數解營

除此數項軍營又有何事別需銀兩且積存銀米過多不能不派兵看守少則於事無裨多則徒分兵力此等皆犯行軍之忌伊等何竟未見及此見在添兵另鑄進剿所有前此辦理未協之處均當速爲更張著傳諭阿桂豐昇額明亮及富勒渾文綬等彼此妥協酌商將應支官兵鹽菜口糧銀米按月解營散給火藥每半月約計若干斤由各軍營知照該督如數運送備用其銀兩酌存數千段匹更無庸多積該督等仍計西路南路及宜喜三處軍營相近之內地將銀米等項寬餘存貯以備隨時續運其鑄礮銅鐵各項固爲利用要資但攻得一處移營進剿尙須將鑄成大礮鑿爲碎銅攜往另鑄則約計數鑄之外亦不必多爲堆貯以上並著該將軍等同該督立定章程辦理奏覆其鄂寶所駐之覺木交見貯銀米並著妥議具奏又據解到自賊脫出之川兵二名交軍機大

臣訊問據張得勝供在簇拉角克守卡卡內止有兵十名陳學供在功噶爾拉新山梁守卡卡內止有兵十五名等語卡兵不過十餘無事則徒令曠閒有事不足禦賊實爲大錯溫福在昔嶺時將萬餘兵分作千餘卡修築旣令士卒疲勞分守更復化多爲少此乃溫福第一失算處各將軍等皆當引爲前車之鑒進兵時切不可復蹈其覆轍○己丑諭軍機大臣等阿桂等見在收復小金川看來尙屬易辦其地雖有金川賊番幫同把守但以主客情形而論金川之人在本處恃險抵禦習其地利便於準備官兵攻打自不免費力若金川賊眾出至小金川地方則彼亦轉而爲客離其地險失其所恃斷不能如在金川之隨宜布置而我官兵自前歲冬底攻克美諾以後經行駐守半年有餘其閒路徑皆所諳悉可以因地制宜熟籌克敵之法我兵分路進剿不但易於制勝迅望

奏功卽金川賊眾在彼幫守者亦可藉此多爲殲戮並莎羅奔岡達克及其大頭人等若在美諾皆可乘勝勦擒實爲最好機會阿桂等惟當努力爲之至於進剿金川自以豫定數路爲要功噶爾拉當噶爾拉兩處雖云正路但其地業經進攻半年賊酋防備已久今見官兵奮勇再進必料仍由此路進攻自復照前豫備阿桂轉可無庸親往此兩處止須擇其中較要者令明亮等統兵前往或可相機攻進餘則另行派員帶兵牽掣若昨奏凱立葉之外更有別路阿桂亦當悉心酌覈總擇各路中最緊要易進者阿桂親自督兵前進其餘則以次權其輕重酌定何路派何人牽掣一面辦理一面奏聞○甲午准各省武生充補營伍○壬寅諭秋讞大典經九卿會覈定擬繕冊進呈朕親爲再三披閱覈其情罪輕重分別句存其稍有一綫可原者必爲求其可生之理予以停句而

實在情真罪當者亦不能曲法市恩稍事姑息以期無枉無縱並
於句到時將應句應免之故詳晰諭示大學士刑部等官皆備聞
之蓋以民命至重從不肯掉以輕心也第國家明罰敕法原以協
刑期無刑之義今秋審招冊內情實應句人犯每歲總不見少豈
朝廷之教化尙有未孚抑愚民罔知犯法之由輕蹈重辟乎古云
刑人於市與眾棄之原欲使家喻戶曉共知儆畏今刑部及外省
奉到秋審句決之旨不過遵照辦理而其人之所犯何罪律應正
法之故民罔不能周知無怪乎歲舉明刑之典而犯法者仍眾也
自當於秋後處決時將該犯必應正法情節摘出簡明數語揭示
通衢俾愚民觸目儆心庶不至輕罹法網但今年各省應句人犯
業經辦竣已屬不及著自朝審句到爲始大學士會同刑部將三
句不引句各犯經朕酌覈情罪分別辦理之處節錄情由呈覽隨

時榜示市曹俾眾知朕明慎用刑至意嗣後辦理各省秋審旬到時並著大學士刑部每次將各犯應緩情節一體摘敘數語奏聞行知各該督撫於處決時出示曉諭以昭儆戒庶幾窮鄉僻壤皆知辟以止辟之意著爲令○甲辰 上幸誠親王允祜第視疾○諭吏部尙書託庸練達老成恪誠匪懈數歷中外盡職宣勤比年以來雖齒逾八旬而精力尙未衰邁部務仍資經理昨九月間據奏病後步履漸艱懇請解任因准其所請晉加太子太保以原官致仕俾得安居頤養以葆大年茲聞溘逝深爲軫悼著派散秩大臣一員帶侍衛十員往奠茶酒所有應得卹典仍著該部察例具奏尋予祭葬諡誠毅○乙巳 上臨誠親王允祜第賜奠○諭和碩誠親王持躬端謹賦性恪誠髫年卽與朕同學讀書在諸叔中最爲親篤迨備位親藩久昭勤慎前以偶嬰微疾卽遣御醫診治

及屢次進見察其形體雖癯而精神尙不至甚憊意謂從容調攝可望卽痊曾勸諭安心靜養昨遽聞病勢增劇隨親往邸第看視軫念殊殷頻遣御前侍衛往探茲竟聞其薨逝深爲震悼卽日親臨奠醑並命皇四子皇十二子穿孝並著加恩賞內庫銀五千兩經理喪事所有一切喪儀及飾終典禮各該衙門察例具奏尋予祭葬諡曰恪○戊申予故四川提督馬全諡壯節貴州提督牛天昇諡毅節並予祭葬及陝西興漢鎮總兵張大經俱入祀昭忠祠○己酉諭前據貝子職銜扎薩克台吉齊旺多爾濟列款呈控定邊左副將軍兼親王職銜車布登扎布種種欺陵及公達什侵蝕驛站馬匹銀兩經理藩院具奏當派貝子瑚圖靈阿署侍郎福祿前往烏里雅蘇台會同額駙拉旺多爾濟詳悉查辦復令調取齊旺多爾濟達什交軍機大臣質問其所控達什之事全屬子虛不

惟車布登扎布並無欺陵齊旺多爾濟之事並供出諾爾布扎布曾經告知從前齊旺多爾濟令協理台吉多爾濟齊旺編造偽書鎮壓諾爾布扎布弟兄等語此事於蒙古舊習大有關係不可不明白根究是以將各供詞發交瑚圖靈阿及拉旺多爾濟令其徹底審明具奏今將瑚圖靈阿等所奏交軍機大臣會同理藩院逐款審訊據稱齊旺多爾濟所控之事半屬子虛惟車布登扎布以烏里雅蘇台庫內發出舊爛棉甲弓箭軍器希圖便宜換易馬牛並將多換羊隻存留伊所屬派補別部兵缺甚爲卑鄙不合請將車布登扎布將軍親王職銜一併革去至齊旺多爾濟從前鎮壓其兄之處雖恃無干證堅不承認但所控之事半屬子虛自應反坐請將齊旺多爾濟貝子職銜扎薩克台吉革去留京令其閒住等語朕以車布登扎布職係親王寄以烏里雅蘇台左副將軍重

任理宜感激潔己奉公乃見小卑鄙如此殊負朕恩本應照議斥革但念前在軍營頗著勞績若全行議革朕心有所不忍著加恩仍留親王職銜至擢用將軍原因額駙策凌及伊弟兄爲國宣勞是以簡任非世世承襲者可比著不必留將軍之任貝子瑚圖靈阿人尙去得卽以補授定邊左副將軍駐紮烏里雅蘇台辦事齊旺多爾濟從前鎮壓其兄雖無干證但諾爾布扎布係伊胞兄達瑪林乃伊屬人豈有無故誣害之理齊旺多爾濟如此妄言誣告直一敗類使其事有確證卽照納遜特古斯治罪豈可復遣回遊牧令其屬下沾染惡習著照所議革去貝子職銜扎薩克台吉留京約束仍加恩將貝子品級降爲公品級扎薩克台吉令伊子承襲此皆朕格外殊恩朕辦理天下庶務一秉至公賞善懲惡從不稍涉偏私將此曉諭喀爾喀內扎薩克蒙古等惟當恪守舊習尊

奉黃教勸習技藝各事其事其鎮壓惡習例應嚴禁况王公台吉扎薩克大員亦復蹈襲可乎嗣後務將屬下蒙古嚴行管束儻有無知妄行者立即嚴拏治罪毋負朕諄諄教誨之至意○辛亥阿桂奏遵旨查詢金川地圖據土兵等言谷噶道不甚艱難而廣噶又言該處山勢陡險坡礮甚大惟從凱立葉作固項攻入易於得利謹將谷噶凱立葉繪圖載入諭軍機大臣等阿桂所奏攻勦金川進兵道路其凱立葉一處亦屬未定之詞今已進兵收復小金川自可計日成功即須分路進勦金川其路徑不可不早籌定著阿桂即速留心探訪覈實密爲酌辦仍即具摺奏聞○甲寅舒常奏據工噶諾爾布之妻策旺拉木遣頭人溫布稟稱金川雖係兩世姻親實爲圖害仇隙見教導兒子及眾頭人比土司在日更加出力並令雍中旺爾結綽爾甲木燦至營輸誠立誓臣等察看

情形實爲恭順請加優賞諭軍機大臣等豐昇額等奏綽斯甲布情形一摺如此甚好著仍差盛英等到被告以將軍已將爾土婦之事奏聞蒙頒諭旨以爾土婦誠心恭順大皇帝深爲嘉慰如梭磨土婦卓爾瑪始終恭順並駕馭其姪卓克采土司嘉噶爾布木從噶克土司納木扎爾等實心出力會賞給名號段匹三雜谷因此更加奮勉今爾土婦策旺拉木教管爾子竭誠報效較之卓爾瑪之駕馭伊姪尤爲切要特賞爾貞義名號並綵段四匹用示獎勵爾更當盡心督率爾子等竭誠報效以繼爾夫工噶諾爾布之志如能設法勦平金川擒獲逆酋爾母子必邀大皇帝格外鴻恩又據奏稱雍中旺爾結綽爾甲木燦來營進見看此情形則雍中旺爾結之應行襲職更無可疑雍中旺爾結既係該土婦之子且爲番眾所歸向尤當亟令承襲土職以堅其心如此施恩伊母子

自必更加感激至其襲職之處屢次所降諭旨甚明豐昇額等卽可遵照辦理並諭阿桂知之

十一月己未阿桂色布騰巴勒珠爾奏臣等定期十月二十九日分路進兵查西路官兵爲克復小金川正路必須計出萬全今探達木巴宗之北有路可通斯達克拉阿噶爾布里碩藏噶爾若派兵潛擊占此三處一路由別斯滿攻底木達布朗郭宗一路攻取兜烏沃克什明郭宗從此順帛噶爾角克山梁卽可直抵美諾至美美卡一路更爲賊酋要地擬於資哩北山下乘其不備派兵直搶或於美美卡之東東瑪色爾渠站住則前往碩藏噶爾之兵下至別斯滿時官兵聯絡接應色布色爾等處之賊自不能久踞臣等商定後卽派兵駐紮色布色爾山梁以防賊斷後路令海蘭察等帶兵往阿噶爾布里等處富興等帶兵自資哩北山下直取美

美卡成德等帶兵奪占資哩南山臣阿桂等從中路攻勦資哩各路接應而南路綽斯甲布之兵同時進發儻得已降復叛之番請暫緩誅戮恐前途望而懷沮大塞堅碉槩行拆毀附近金川人戶亦當別籌移置使賊無憑藉之地諭軍機大臣等阿桂等奏分路派兵勦復小金川一摺所辦甚好佇盼捷音此次添有滿洲勁旅聲勢甚盛而阿桂等派撥帶兵之處亦甚合宜看來收復美諾自屬易事況小金川番眾與金川離心之處傳聞已屢乃情理所必然今見大兵進攻且隨路遣人招致其望風來降亦可意料而得惟是此等降番皆係曾經叛逆之犯於法本無可恕但處之過嚴不但小金川諸番聞而生畏前途未必復肯來降且金川賊眾聞之更不敢前來投順益以堅其死守之心自不可不權宜辦理第阿桂所稱其大塞堅碉斷不可留而附近金川人戶亦當別籌移

置所遺碉寨並應槩行拆毀使賊無憑藉之地等語所見固是但拆毀碉寨殊非易事既恐輕分兵力且不免稍稽時日卽別籌移置亦非其願况前次宜喜軍營以弁兵七八人管解廣噶一人尙致脫逃今小金川番眾如果來降數必不少當得弁兵幾何方敷押解設或中途又致竄逃更復成何事體朕意莫若且不動聲色照常安插卽有必須正法者總俟兩金川平定後再行分別籌辦庶爲萬安然情形隨時不同惟在阿桂等審度機宜妥爲辦理或有可疑之人不得不辦者又不可拘泥此旨也且從前賊眾潛出美臥溝至底木達等處招誘降番復叛滋擾木果木軍營之事皆由溫福妄自尊大不聽人言不恤士卒又一切全無料理致令眾心生怨而劉秉恬董天弼於防閑後路又復貽誤致賊番得以肆其猖獗今各路將軍等諸事妥爲調度賊酋自無隙可乘而後路

諭令富勒渾王進泰統兵駐守以劉秉恬董天弼爲戒加意防範自不至稍有疏虞今進兵已有五六日深爲盼望一有喜音卽隨時迅速奏聞○丁卯諭據阿桂等奏十月二十七日分兵各路進剿小金川均於十月二十九日子刻一齊全進以次攻克資哩南北山梁阿喀木雅美美卡木蘭壩並收復沃克什官寨賊人畏懼遁入路頂宗聚守官兵乘銳力攻以期卽克此內如阿喀木雅美美卡木蘭壩勢俱絕險前經五六月之久始能克取今乃於兩日之間盡能克復殲戮賊人不少皆由滿洲勁旅奮勇絕倫緣營兵皆得有所效法不但新兵倍常出力卽舊兵亦奮勉爭先統俟詳查明確再行具奏等語又據明亮奏南路官兵亦於十月二十九日子刻分路進剿將河南之得布甲河北之喇嘛寺得里兩面山梁日寨策爾丹色木盡行攻克殺賊二百餘所獲槍刀火藥等項

甚多見在鼓勵官兵乘勝前進所有八旗勁旅勇往直前綠營各兵亦互相勉勵思效俟備細查明另奏等語收復小金川其勢較易朕已久經料及但此次甫經進兵數日之間卽連得賊人險要碉卡殺賊甚眾覽奏深爲嘉悅將軍參贊調度董率有方西路之領隊大臣額森特於攻勦資哩木蘭壩時較眾倍加奮勉南路之領隊大臣奎林攻克得里賊碉亦甚勇銳均著交部議敘其在事出力之將領弁兵並著阿桂明亮等查明咨部一併議敘其中有勇勉超羣者查確專摺奏聞候朕量加優獎將此諭眾知之○諭軍機大臣等據阿桂明亮等奏到兩路同時進勦連克賊酋碉卡阿桂已抵路頂宗明亮已過策爾丹色木距美諾均不遠自可卽望捷音此次進兵以來兩日之間連得賊酋險要碉卡如摧枯拉朽固由添派滿洲勁旅勇往直前綠營兵亦皆效法知勉是以所

向克捷但究覺得之太易恐賊酉暗藏詭計或讓我兵直進在後抄截不可不防在官兵見俱乘勝而進自當鼓其銳氣使益奮勇成功所謂兵貴先聲亦董勸將士之道至帶兵之將軍參贊領隊等遇事當倍加慎重不可因連次得勝稍存得意自滿之心滿招損謙受益古訓昭垂將軍等各宜深體此意凡進兵後路加意嚴防慎之又慎方爲妥善就見在情形而論官兵乘勝深入實有席卷之勢其於克復美諾布朗郭宗等處自非難事卽剋日集勦亦不足言喜惟能將莎羅奔岡達克丹巴沃咱爾及七圖安堵爾等一併設法擒獲朕方喜慰蓋岡達克丹巴沃咱爾乃索諾木所恃主謀得力之人而七圖安堵爾向爲僧格桑管事一切狡詭可惡之處皆彼黨助此三人斷不可輕宥卽或岡達克丹巴沃咱爾二人未必果在美諾或聞官兵勢盛仍復竄回皆不可定而七圖安

堵爾爲小金川舊賊目自必在美諾等處率眾拒守阿桂明亮等
均當一體留心若能將賊酋賊目等拏獲卽選派妥幹之員解京
嚴審辦理所有將軍等此次統兵調度有方深爲嘉慰阿桂明亮
著各賞大荷包一對小荷包四箇色布騰巴勒珠爾富德各賞大
荷包一對小荷包三箇海蘭察長青奎林各賞小荷包三箇普爾
普烏什哈達額森特特成額海祿富興三保舒景阿各賞小荷包
二箇以示獎勵至豐昇額等一路雖係牽綴之兵其進兵以後情
形若何亦著迅卽具奏○己巳諭據阿桂等奏初二等日連克
路頂宗明郭宗等處見在已克復美諾並攻得別思滿兜烏帛噶
爾角克碉各情形一摺已於摺內批示矣收復小金川之易朕原
早已料及第官兵等能於一二日內連次克復美諾等處剿殺多
人並搶獲礮位米糧實屬迅速所有將軍阿桂參贊色布騰巴勒

珠爾俱著交部議敘其在事之將弁兵丁等均屬出力奮勉並著阿桂等查明咨部議敘如有超眾奮勇者卽行具摺奏聞候朕另降諭旨又據豐昇額等奏從宜喜覓路攻奪沙壩山梁礪卡殺賊百餘並奪獲礮位器械等語宜喜一路此際原係牽綴賊勢今官兵等同日進攻卽能克礪殺賊亦屬勇往出力豐昇額等及在事將弁兵丁等俱著一併交部議敘○諭軍機大臣等阿桂等奏連克路頂宗明郭宗等處見已克復美諾業經降旨交部議敘並諭將攻勦路頂宗之攀越直上官兵從優議敘其何人首先躍入賊礪亦令查明具奏候朕另降諭旨至官兵自進攻以來僅五晝夜卽克復美諾等處可謂迅速但具奏七圖安堵爾於官兵甫抵明郭宗卽行逃竄不知所往等語七圖安堵爾爲僧格桑用事頭人所有小金川狡謀惡計多出於彼實爲可恨今自揣力不能支又

不肯束手就縛自必仍逃往金川恐未能即時追復看來岡達克丹巴沃咱爾料我必不歇手自然進兵攻剿遂將美諾等處交付七圖安堵爾二人先回金川今七圖安堵爾又復竄去可惜失一好機會是以雖聞捷奏不能慰懷也惟是此次進攻因添有滿洲勁旅士氣奮興軍威大振所向克捷以此先聲足令賊眾聞而膽落稍爲可恃今阿桂已差人往南路通知明亮等會兵想美諾克復之後僧格宗一帶賊人必皆望風潰去明亮等自更易於直進其底木達布朗郭宗等處亦無難即時收復阿桂當一面酌量小金川善後事宜及派兵防禦後路糧臺諸務交富勒渾王進泰妥爲經理阿桂明亮卽一面帶兵分路攻剿金川乘將士新勝銳氣鼓勇直前且當賊人未及守拒之時攻其無備成功更爲利便阿桂等當努力爲之佇聽捷音但於何路進攻較妥阿桂尙未籌定

朕意美卧溝一路爲兩金川要隘賊酋未必於此堵截或可從此而進使之猝不及防又今年夏間賊至木果木軍營後路滋擾並非自昔嶺迎面而來其由金川潛出之路卽可爲我兵密進之路亦賊所不能豫備者若用此兩路兼進較之當噶爾拉等舊路尤爲妥速著傳諭阿桂將是否可行之處卽速妥酌奏聞又豐昇額等攻得沙壩山梁賊碉一處因難於駐守隨卽拆毀宜喜一路究難深入豐昇額等在彼尙未知小金川捷報今阿桂已將美諾等處全行克復卽當進兵攻勦金川自必寄札約會並進豐昇額此時當遵前旨率同書麟伍岱彰靄等帶領官兵馳往黨壩相機攻勦其宜喜一路留舒常在彼並齎賞阿桂色布騰巴勒珠爾額森特海祿成德等御用黑狐冠各一頂候其到時祇領並聞沃克什等處之捷御製紀事詩一章書賜阿桂亦隨報發往並賞豐昇額

舒常小荷包各四箇書麟馬彪伍岱彰霽烏爾圖納遜小荷包各

二箇將此傳諭知之○以德成爲廣東按察使

由雷瓊道遷

○辛未

上臨大學士劉統勳第賜奠○諭大學士劉統勳老成練達品行端方雍正年間耆舊服官五十餘年中外宣猷實爲國家得力大臣自簡任綸扉兼綜部務秉公持正眷畀方殷並命爲諸皇子總師傅久直內廷勤勞懋著雖年逾七旬精神甚爲矍鑠翼其可以常資倚任今晨肩輿入直至東華門忽嬰痰疾比聞之卽遣御前大臣尙書公福隆安齋藥馳往看視至則業已無及遽聞溘逝深爲震悼著加恩晉贈太傅入祀賢良祠朕卽日親臨奠醑並賞內庫銀二千兩經理喪事其任內革職降級之案槩予開復伊子陝西按察使劉塘並著諭令卽行馳驛來京治喪守制所有應得卹典仍著該部察例具奏尋予祭葬諡文正○諭伍岱在軍營歷練

已久於攻戰機宜尙能熟悉著授爲領隊大臣遇有攻勦之處豐
昇額務虛衷商酌而行以期妥善○壬申論梁國治著來京在軍
機處行走湖南巡撫員缺著巴延三調補仍署理山西巡撫敦福
著調補湖南布政使護理湖南巡撫事其湖北布政使員缺卽著
吳虎炳調補畢沅著補授陝西巡撫其陝西布政使員缺著富綱
補授淑寶著以布政使銜往喀什噶爾更換蘇爾德所遺廣西布
政使員缺卽著蘇爾德補授德文著賞給按察使銜往喀什噶爾
更換曠善明琦著賞給道銜往哈密更換佛德伊等到各該處俱
著自備資斧效力三年雙頂駐哈密業已五年仍照前例著軍機
大臣將應派之人帶領引見發往更換○以孫含中爲陝西按察
使

由江蘇蘇
松道遷

○癸酉諭據明亮等奏大兵攻克河南北山梁後賊

番俱至僧格宗死守官兵將賊人所占山梁之上奪其更高處向

下壓擊山下官兵又奮勇向上夾攻遂克復僧格宗等處得糧一千數百石火藥五十餘包並接到阿桂收復美諾之信卽統兵前往會合等語所辦甚合機宜前據明亮等節次奏報克復河南北山梁等處業經降旨將將軍參贊及在事出力之將弁兵丁交部議敘所有此次收復僧格宗奮勉官兵等並著查明交部併案議敘○戊寅諭軍機大臣等阿桂奏收復大板昭曾頭溝並汗牛番人降順小金川全境蕩平又籌辦降番事宜所辦甚妥但兵貴神速官兵早進一日賊人守禦尙未甚堅或能攻其無備乘勢得手亦未可定至凱立葉谷噶等處與大板昭相近阿桂在日隆未收小金川之前自難探其詳細今大板昭旣已克復則詢訪尤易得實亦當及早查明如可作爲正路阿桂卽於此進兵至收復小金川所向克捷實由添滿洲勁旅聲勢甚盛其先聲已足令賊怖懼

今阿桂等統兵進剿金川必擇形勢便利可以打仗得手之處將賊眾多加殲戮使皆望風喪膽各路攻剿自更易爲力

十二月丙戌諭海蘭察等前因不能駐守美諾經阿桂查奏將伊等革職留任其咎固屬應得此次收復小金川均能奮勉出力各著勞績著加恩將海蘭察富興烏什哈達成德富紳海祿所有革職留任之案准其開復其各本任應得養廉分例並著照例交給

○丁亥阿桂色布騰巴勒珠爾奏分路進剿金川查凱立葉一處自大兵克復瑪爾當大板昭後探明谷噶地方與凱立葉相近或擇一路作正路一路酌量揚威臨時再行辦理又臣明亮南路有河北之馬奈馬爾邦均係乾隆十二三年進攻舊路且後接巴旺布拉克底邊界竟可坦然前進至小金川全境番人既均內徙寨落已悉焚燒一帶地方盡爲荒山空壤美諾亦成廢地卽不設兵

駐守其小金川之竄在金川者亦難再出占踞而金川正當分路
剿殺之時亦斷不能分人再占小金川之地惟期後路稍省一兵
卽多增一兵之用臣阿桂部署後卽速前往底木達帶兵前進臣
明亮亦同時並舉得旨爾等所議甚是不入虎穴不得虎子勉之
惟俟捷音速至諭軍機大臣等阿桂議於谷噶凱立葉及馬奈馬
爾邦兩路籌辦糧運並防範後路之處俱尙合宜惟稱小金川全
境番人旣均內徙寨落焚燒卽不設兵駐守亦難再行占踞所言
殊未當理阿桂之意不過以後路稍省一兵卽可多增一進剿之
用所見者小而所昧者大當今進剿金川行軍機要所關甚重內
外諸臣熟悉軍旅實無出阿桂之右何於此等最要節目疏略若
此小金川密邇金川地關扼要昨歲官兵攻打半年始能攻得今
歲則旬日之間悉行收復其勢又屬太易前此惟恐阿桂等意存

於滿曾屢降旨令其加意謹飭初不料其將美諾一路忽不經意至此况我軍此次因添滿洲勁旅所向克捷聲勢甚盛正當將克復之小金川全境妥爲安置使官兵藉以爲根基賊酋稍有所畏懼所謂得寸則寸前此西陲用兵皆係如此辦理阿桂豈忽而忘之况兩將軍分路進兵中間正當聲息相通方爲有益若有阻隔亦多未便阿桂何全未籌度及此耶至豐昇額帶兵由黨壩一路進攻固亦備用之一策但見在阿桂所進之谷噶凱立葉俱係通勒烏圍之路相距黨壩不遠阿桂到後或酌量該處有可進情形不妨酌調豐昇額速赴谷噶等處籌辦均係國家公務原不容稍分畛域也○戊子諭今年七月間據陳輝祖奏請將該省民屯新墾丁銀隨年攤徵一摺批交該部議奏旋經戶部卽照陳輝祖所奏覆准並請行查各督撫就本省情形酌籌妥議具奏朕彼時駐

蹕熱河正值籌辦軍營事多未及詳加審覈且以部議通准各省必其事屬應行遂爾依議據直隸等省陸續議奏大槩請仍舊制者居多則陳輝祖所奏及該部所議皆未爲得當國家承平休養百有餘年閭閻生齒日繁歲有增益向來編審人丁按丁科則我皇祖聖祖仁皇帝特頒恩詔盛世之民永不加賦卽以是年丁糧之數作爲定額仰見皇祖惠愛黎元厚澤深仁法良意美實我萬世子孫臣庶所當遵守不易者蓋民爲邦本庶富相因但令小民於正供之外留一分贏餘卽多一分蓄積所謂藏富於民百姓足君孰與不足者此也朕臨御以來仰承天佑祖德際茲累洽重熙無時不以愛養斯民爲念是以兩次降旨普蠲天下錢糧並輪蠲各省漕米爲數不啻數千百萬而因災蠲賑及隨時恩免者尙不在內所冀羣黎益慶盈甯共享昇平之福豈肯於丁糧

區區毫末之賦稍存計較乎見今海寓戶口繁滋難以數計如各省糧價有增無減即可爲滋生繁庶之徵况人數旣多自地無遺利安得復有未闢之曠土廣爲墾種升科若求可墾之地則惟新疆烏魯木齊等處地土沃衍尙可招徠屯墾至於內地開墾一說則斷無其事各省督撫亦斷不得以此爲言卽或瀕河沿海之區閒有東坍西漲其數甚微止須地方官查明照例妥辦若以新墾民屯地畝復將丁銀隨年攤納是與小民較及錙銖尤非惠下恤民之道陳輝祖原奏固屬瑣碎見小而戶部議覆亦復未識大體所有各省辦理丁糧一事無論已未覆奏俱著悉仍其舊毋庸另議更張其湖北長蘆二處已經該部覆准者亦不必行仍令照舊辦理並將此通諭中外知之○己丑以德明爲禮部侍郎

由太常寺少卿

○癸巳諭向來清字譯漢對音其漢字有平上去入四聲而清

文之字本少是以不拘平仄僅倣六書假借之意通融對譯昨朕偶閱繙繹通鑑輯覽內如衛與魏對音清字通用一某字但衛與魏原有輕重二字中衛字應從輕呼魏字應從重呼清文衛與魏亦有輕重之分是以於書內分別改正卽如漢字凡係尊稱者不加點而罕漢等字則加點以別之專之與傳亦然以此類推如兩字而音有輕重可分者卽從衛魏之例其止一字之音難以分寫者則於本字左右上下照罕傳等字加點以昭區別卽不能盡如漢字之按四聲發圈而於音韻不至相溷亦可以補對音所未及著交繙書房大臣詳悉妥議具奏候朕審定刊刻成書用彰同文之盛○實授彰寶雲貴總督○丙申諭據明亮等奏巴旺布拉克底土司土婦派令士兵隨征以來屢著勞績其布拉克底土司從前所給安撫司印信見歸巴旺土婦掌管請另給印信號紙以昭

世守又巴旺土舍雍中扎布辦事實心請賞戴花翎等語布拉克
底土司阿多加恩賞給宣慰司之職著該部給與印信號紙巴旺
土舍雍中扎布並著賞戴花翎又據奏此次收復小金川帶領土
兵打仗之頭人格宗丹巴七立勒耳伍太郎巴耳結申古朋勒耳
烏結杜耳金邦俱奮勇出力內除格宗本係土都司職銜餘請酌
給土守備土千總職銜並請加賞藍翎等語格宗著賞戴藍翎丹
巴七立等著明亮等各分別給與職銜仍各賞戴藍翎俾得一體
邀榮以示優異○諭軍機大臣等阿桂駐在美諾已經一月若俟
朕批摺回時已四十餘日距所擬歲底歲初剋期合勦之說正當
其時阿桂各項部署諒應就緒務卽酌派妥協與豐昇額明亮訂
期會勦仍將進兵日期迅速奏聞至阿桂所擬谷噶凱立葉及馬
奈馬爾邦兩路進兵若此時早事聲張賊得以豫爲防堵殊屬非

計如欲赴馬奈一路應令奎林或富德統兵徑往當噶爾拉進攻使賊信我兵仍由原路進勦力爲堵禦我兵潛赴馬奈等處出其不意自可易於得手其欲赴谷噶等處者亦當於功噶爾拉山梁派兵攻勦以綴賊番全勢而我兵乃潛由大板昭直取谷噶凱立葉兩路亦使賊番猝不及備如此方合用兵指東擊西奇正虛實並用之道阿桂熟於軍務當妥酌實力爲之佇聽捷音又據奏小金川全境必有能事之大員始堪督率富勒渾王進泰二人俱屬小心謹慎然過慎則憊此論頗爲近理前此原以二人身任督提地方乃其專責且呼應亦靈是以派令後路照料今阿桂所奏如此則二人自不足恃據稱雲南提督長青練習軍務熟悉邊情於緊要之路酌令長青往駐等語長青留駐美諾等處自爲有益已有旨令富勒渾等諸事與之虛衷商酌勿稍存畛域之見並著阿

桂轉諭長青一切當引爲己任勿以見有督提在彼稍存推諉仍將辦理情形具摺奏聞至美諾既有長青已爲足恃成果雖有骸疾然帶兵諳習實爲得力之人阿桂若由凱立葉進兵則三雜谷後路宜有接應當令成果帶兵一二千在三雜谷駐守可卽妥酌行之又據豐昇額等奏於黨壩一路進兵之說尙屬未定前因黨壩一路難於徑進豐昇額竟可不必前往卽速將俄坡一路蹠訪明確俟阿桂札會師期剋日進剿○丁酉張鎮因病休致以顏希深爲河南布政使○戊戌諭軍機大臣等據阿桂奏所定谷噶凱立葉及馬奈馬爾邦兩路分進之說兩將軍相隔太遠中間聲息難通而後路又無策應種種未協機宜看來各路之中馬奈馬爾邦一路在布拉克底巴旺地方該土司旣係誠心出力自可望易於得手第恐明亮處兵力稍單不能不仗重兵接濟方可乘勝殲

入莫若令阿桂駐兵僧格宗以壯聲援一聞明亮處得有便易卽刻移兵前往繼進自爲有益況見在進兵之初尤須布置妥協賊人始無從揣測如功噶爾拉富噶爾拉兩路係今歲進攻之地必須仍派兵往彼照前攻打賊人方不至生疑其當噶爾拉一帶係奎林熟路應令其領兵二千前往攻剿至功噶爾拉一帶則令富德領兵二千前往攻剿伊於帶兵打仗之事究爲諳習此兩路在我雖用爲牽綴當使賊人視爲正兵先在軍營傳播俾賊眾共聞悉力拒守然後潛派精兵令明亮帶往馬爾邦一路攻其無備其谷噶凱立葉一路則令額森特帶兵二千前往以資出奇之用阿桂則統領眾兵駐紮僧格宗以爲南路聲援並令色布騰巴勒珠爾統兵駐布朗郭宗等處爲兩路策應如此則犄角之勢自成軍聲壯盛賊眾不敢輕視後路潛出滋事再奎林高德前往富噶爾

拉功噶爾拉兩路並非令其專意在彼攻剿如度爲可進則進如勢尙不能則竟不如誘賊出而邀我之後我兵還而截剿得以多殲賊眾或並乘其敗潰追過險要竟有所得尤爲極好機會奎林富德當努力妥爲之再阿桂所請擇日進兵計阿桂見在尙駐美諾此旨到後亦當及進兵之期此月二十七二十八皆係吉日阿桂可擇而用之佇聽捷音○辛丑以李侍堯爲武英殿大學士兼兵部尙書仍管兩廣總督事○癸卯豐昇額奏接得阿桂咨稱西路擬從谷噶凱立葉進兵令臣等或由黨壩或由穆爾津岡自行酌定查綽斯甲布之宜喜日旁甲索俄坡等處均樹木叢深道路險窄進兵旣爲無益復將穆爾津岡等處詢問經過之人俱云兵可行走俟阿桂兵到谷噶彼此約定日期一同攻取諭軍機大臣等朕昨已降諭旨令明亮等於本月二十八九等日進兵今豐昇

額卽依所奏由穆爾津岡前進並移知阿桂令其相機策應將此諭令阿桂明亮知之○甲辰諭本月二十日豫妃薨逝著輟朝三日派皇八子皇十二子七公主及七額駙拉旺多爾濟穿孝並著皇六子質郡王內務府大臣金簡總理喪儀所有應行事宜著各該衙門察例具奏○己酉明亮富德奏臣等定議進攻馬奈馬爾邦據探路頭人稟報河北馬奈山路難進必從駱駝溝內繞道截出馬奈卡卡角之前其河南前敵博堵之上地名思覺極關緊要必須一併攻克直偪克舟九寨臣等商從駱駝溝分兵兩路一取馬奈一取卡卡角一面由馬奈對河之格魯克古卡卡角對河之木底渡兵前往上下夾攻迎面正路官兵亦卽直前進剿其河南博堵地方一經攻克卽迅搶占思覺扼其要害使賊分應不暇豐昇額奏穆爾津岡道路險峻稠卡接連臣等擬由小路猝上將山

頂占據往下壓擊計所調之湖廣兵續到可以進取諭軍機大臣
等明亮等於馬奈馬爾邦分兵進取所籌甚好昨諭富德仍往明
亮處同由馬奈馬爾邦進剿富德接奉諭旨後自卽趕赴明亮軍
營分路並進諒不至誤會剿之期看來馬奈馬爾邦一路旣探得
從駱駝溝潛進之道且可分兵夾攻似此路更易於克捷又據豐
昇額奏見至黨壩察探路徑豐昇額若果攻得穆爾津岡要隘料
其地可以自上而下壓取勒烏圍賊寨原可與伍岱分前後撥而
進或乘其不備竟能攻克亦未可定然總不宜稍涉孟浪惟在豐
昇額與伍岱隨時妥酌而行朕不能於六七千里外槩爲一一籌
及也○辛亥諭軍機大臣等阿桂回奏各摺其籌辦谷噶等處進
兵情形一摺請令豐昇額卽帶兵往攻凱立葉占住山梁則賊人
不能潛行翻山堵截谷噶後路等語此計甚是必應如此辦理著

傳諭豐昇額移兵前往凱立葉占據山梁方妥至谷噶一路阿桂
既以爲正路親自往剿仍當將所有之兵分起派員帶領以次而
進我兵源源接濟聲勢益盛賊眾自必望而生畏至豐昇額所帶
兵五千亦當仍遵前旨令伍岱爲前起先進豐昇額在後繼進尤
覺得力所有黨壩原駐之兵仍令五福帶領在彼駐守已足資防
截其官達色所帶之兵則隨豐昇額往剿凱立葉於彼處留防後
路亦爲有益至閱見擬留兵駐守之圖其在美諾偏北如喇布寨
帛噶爾角克碛一帶皆兩金川相連之境居多又爲谷噶進兵後
路自應留兵防守若美諾東西之阿爾圖德木達策布丹沙木拉
爾資等處距賊境甚遠且其地尙在美諾營盤之後賊斷不能越
過滋事此一帶防兵似屬虛設況兵力聚之則見其多分之易形
其少今此四處之兵多者一二百少者五十若遇剿禦之事未必

得力徒令我兵以分見少亦爲非計又何如省此四百五十餘兵
並於功噶爾拉當噶爾拉湊用爲得實濟乎此圖想係阿桂未奉
功噶爾拉當噶爾拉分攻諭旨時所定故爾節節籌備若功噶爾
拉當噶爾拉既有牽掣之兵則各臨防守又當隨宜酌定著阿桂
再行妥酌遇便另爲繪圖貼說具奏○壬子諭李宗文見在出差
其禮部侍郎員缺著梁國治署理袁守侗不必兼署○是歲朝鮮
安南來貢○會計天下民穀數各省通共大小男婦二萬一千八
百七十四萬三千三百十五名口各省通共存倉米穀四千一百
二十四萬九千十二石六斗六升五合六勺